

# 100 onns Banca Naziunala Svizra

## Garanta per pretschs stabils en noss pajais

■ (anr) **La Banca Naziunala Svizra po festivar quest onn ses tschientenari. Ella è la protectura dal franc svizzer e garante-scha la stabilitad dal daner. Quai è ina da las pli impurtantas premissas per ina economia flurenta.** La Banca Naziunala Svizra è bunamain 60 onns pli giuvna ch'il stadi federal da 1848. Lez onn avevan ils chantuns surdà il dretg da batter munaidas a la confederaziun. Las bancnotas èn dentant vegnidas dadas or vinavant da bancas privatas e chantunals. Enturn 1880 deva igl anc en Svizra 36 instituts ch'emissionavan bancnotas. Pir 1891 è vegnì adossà a la confederaziun il dretg d'astgar dar ora persula bancnotas.

Quest monopol pudeva vegnir surdà tant ad ina banca statala sco ad ina banca d'acziars sut surveglianza dal stadi. 1905 han parlament e pievel sancziunà l'introducziun d'in institut per bancnotas en furma d'ina societad d'acziars. Dus onns pli tard, pia 1907, è la Banca Naziunala Svizra vegnida en funcziun. Ella reglescha la circulaziun dals daners, levgiescha il traffic da pajaments e fa ina politica da credit e valuta en l'interess dal stadi. Radund duas terzas da sias acziars èn en possess dals chantuns, il rest da privats. La confederaziun na posseda naginas acziars. A la testa stat in directori cun trais commembers, mintgamai schefs dals departaments, ed eligids dal cussegl fede-

ral. La sedia administrativa sa chattata a Berna, quella dal directori a Turitg.

### Pretschs stabils han prioritad

La Banca Naziunala Svizra agescha independentamain pertutgant la politica da daners e valutas. Ella sto sa laschar direger segund constituiziun e leschas be dals interessaziunals. Sia finamira primara è da procurar per pretschs stabils e resguardar il svilup da la conjuntura. Er influenzescha ella las cundiziuns generalas da basa per il svilup da l'economia. Sia politica da daners realisescha ella cun fixar il pe dal tschains.

### Grondas pretensiuns per las bancnotas

La Banca Naziunala Svizra procura che l'economia disponia da bancnotas che correspundian ad autas pretensiuns da qualitad e segirezza. Era reparta ella – per incarica da la confederaziun – la munaida. Ensemen cun las bancas e la Posta è la Banca Naziunala Svizra ina da las purtadras principals en il sistem dal traffic da pajaments.

Er l'administraziun da las reservas da valuta cumpeta a la Banca Naziunala Svizra. La constituiziun l'oblighescha da furmar sufficientas reservas da valuta. Quellas segireschan la confidenza en il franc svizzer. Talas gidan era d'impedir u surmuntar crisas.



**La finamira primara da la Banca naziunala è da procurar per pretschs stabils e resguardar il svilup da la conjuntura.**

KEYSTONE